


Oliver Figaroa, di conductor na Rotterdam pa Aruba riba tram

“Mi ta sinti mi hopi orguyoso di ta e prome chauffeur di tram”

ORANJESTAD (AAN): For di prome instante cu sr. Oliver Figaroa a tende cu Aruba ta pasando den un era di innovacion y cu Gabinete Mike Eman ta bay renoba Caya Grandi incluyendo un tram pa core dor di dje, e

tabata sa cu momento a yega, despues di mas cu un decada, pa e regresa su isla.

Asina e conductor di tram a bisa. Orguyo ta un sentimento cu e ta biba cune tur dia y mas tanto ora cu e ta na pia di trabou. Como un di e shete



conductornan di AruTram, sr. Figaroa ta wak tur momento motibonan pa sinti hopi contento di ta un Arubiano y di ta biba na Aruba.

“E caya a keda sublime. Ami ta sinti mi manera cu mi ta na Merca of Hulanda. Ora mi ta coriendo, mi ta sinti mi grandi,” Figaroa a comenta.

El a cuminsa traha na december y tabatin e honor di ta e prome chauffeur cu a core tram na Aruba. Na Hulanda, Figaroa tabata eherce e mesun trabou aki pa hopi aña. Gobierno di Aruba ta hopi contento ora cu el a acerca

nan pa ofrece su conocemento y experiencia. Di su banda, e trabou aki a trece recuerdo y sentimentonan cu e lo keda cune pa resto di su bida.

“Pa prome biaha cu nos a drenta caya cu e tram, mi a sinti mi manera un heroe. Asina bon el a bay.” Fuera di esey e no tin duda pa bisa cu e ta hopi contento y gradicido pa e oportunidad cu el a haya di Gabinete Mike Eman pa e por a regresa su isla. Su trabou ta dushi. Tur dia e ta wak con su isla ta bayendo dilanti, birando mas bunita y con nos bishitantenan tambe

ta aprecia esey. “Bo ta saca hopi potret cu publico, turista y local. Ora nan core den dje, nos ta ripara cu e ta util pa nos haci uso di dje. Nos ta aprecia tur turista cu ta bin y ta duna nan e servicio cu mester duna nan. Nan ta keda contento.”

Mescos cu su coleganan, Sr. Oliver Figaroa ta ansioso pa e ultimo fase di caya principal keda cla pa asina nan por core full e ruta. Nan kier core full ocho ora cu publico paso e demanda sigur tey. “Hopi biaha ta duel nos, pero nos no por bay mas.” Mientras tanto gobierno ta sigui traha duro, den luna di juli a presenta e ley di trafico y presupuesto na Parlamento, cu a keda aproba.

E ley a drenta na vigor dia 1 di augustus. Den e proximo siman e carga cu ultimo material di borch y señal mester yega di Hulanda pa wordo instalainmediatamente, mientras cu e contratista ta caba cu e ultimo parti di Caya G.F. Betico Croes cu ta e caminda e tram ta lora pa tras di ex Nikki Habibe pa bin bek abou.